



Original Article

Analisis Strategi Membanteras Rasuah Menurut IslamAfriadi Sanusi^{a*} & Sharifah Hayaati Syed Ismail^a^a Department of Siyasah Shar'iyyah, Academy of Islamic Studies, University of Malaya, Malaysia

* Corresponding author, email; adirao76@gmail.com

ABSTRACT

Many people believe about what and how corruption in the view of Islam in guidance by al-Quran and Sunnah. Al-Quran and Sunnah also explains how to eradicate corruption by Islamic approach. Because almost all Muslim countries currently hit by the disease of corruption, then it would be nice if every country to emulate the approach taken by the Prophet, *Sahabat* and the *tabi'in* in fighting corruption in their days. This is a qualitative study that collects data through a variety of methods of literature review, historical method and content analysis of primary sources including tafsir, hadith, *turath*, books and articles in journals.

Keywords: Strategy; eradication; corruption; Islam

Pendahuluan

Dalam Kamus Dewan edisi keempat, Rasuah bermaksud; pemberian untuk menumbuk rusuk (menyogok, menuap, sogok, suap),¹ Manakala kalimat rasuah dalam kamus al-Mukhtar berasal daripada kalimat *rasya* yang bererti tali timba yang digunakan untuk mengambil air perigi.² Menurut Salim, *rusyan* dan *risyan* adalah jama`nya rasuah³. Dalam Tafsir Munir disebutkan bahawa *rasya* adalah jamaknya rasuah.⁴ Rasuah juga bermakna, yang menghubungkan kepada hajat yang dilarang menurut Nawwar⁵. Sedangkan *ar-Rasyi* orang yang memberikan sesuatu kepada pihak kedua yang menyokong perbuatan batil. Adapun *raisy* adalah perantara dari pemberi dan penerima korupsi dan *al-murtasy* adalah penerima rasuah⁶. Dalam kamus bahasa Melayu, rasuah adalah penyakit masyarakat yang berbahaya dan sesungguhnya rasuah itu adalah haram hukumnya.⁷

¹ Lihat, *Kamus Dewan* edisi keempat. (Kuala Lumpur: Dewan Bahasa dan Pustaka 2005), 1292

² Lihat, Abu Yazid al-Bustamami, *Kamus al-Mukhtar*, (Selangor: Crescent New, 2006), 324

³ Lihat, Salim Hani Mansur, *ar-Rashwah*, (Beirut: Dar Basho`ir Islamiyah, 2009), 12

⁴ Lihat, Wahbah Bin Mustafa al-Zuhayli. *Al-Tafsir al-Munir fi al-'Aqidah wa al-Shari'ah wa al-Manhaj* (Damsyik: Dar al-Fikr al-Mu'asir, 1418 H.), 202

⁵ Nawwar Bin al-Sally, *Ar-Rasywah, Adda` wa Addawa`*, (Kaherah: Dar Salam, 2015), 13

⁶ Abu Abdul Halim Ahmad S, *Bahaya Korupsi Kepada Masyarakat Menurut Islam*. (Jakarta: penerbit Al-Kautsar, 1998), 1

⁷ Abdul Rauf Dato` Haji Hassan, *Kamus Bahasa Melayu -Arab*, (Selangor: Oxford Fajar, 2005), 215

Al-Rusyah, risyawah, atau *al-rasywah* juga bermaksud habuan atau upah. Rasuah juga didefinisikan sebagai sesuatu yang diberikan kepada seseorang untuk mem batil-kan yang hak atau membenarkan yang batil. Atau sesuatu yang diberikan kepada hakim atau lainnya dengan harapan pemberi suap dimenangkan kesnya dengan memberi segala keinginan dan permintaannya. Rasuah ialah suatu yang diberikan kepada seseorang untuk menghidupkan kebatilan atau menghancurkan kebenaran. Rasuah ialah memberikan harta kepada seseorang sebagai imbalan pelaksanaan tugas atau kewajiban yang mana tugas itu harus dilaksanakan tanpa menunggu imbalan atau wang komisen. Rasuah ialah imbalan yang diambil seseorang atas perbuatannya yang menyalahkan kebenaran dan membenarkan kebatilan, dan balasan yang dinikmati seseorang atas usaha untuk menyampaikan hak orang lain yang berhak. Ertinya seseorang hakim tidak akan memberikan hak kepada yang berhak dan tidak berusaha menyelesaikannya sehingga dia diberi rasuah.⁸

Menurut Yusuf al-Qardhawi, rasuah termasuk memakan harta orang lain dengan jalan batil. Rasuah iaitu memberikan wang kepada penguasa atau petugas, supaya penguasa atau petugas tersebut memenangkan hukum untuknya dengan mengalahkan pihak lawan, atau supaya mendahulukan urusannya atau melambatkan.⁹

Rasuah ialah sesuatu yang diambil tanpa sebarang pertukaran dan dicela orang yang melakukannya. Rasuah iaitu, setiap harta yang dibayar untuk membeli (mendapatkan) pertolongan daripada orang yang mempunyai kedudukan bagi membantu melakukan perkara yang tidak halal. Sesuatu yang diberikan bagi tujuan membatalkan sesuatu hak (kebenaran) atau menjadikan sesuatu yang batil sebagai hak.¹⁰ Menurut Deliar Noer, rasuah juga bermaksud mengambil harta secara tidak sah¹¹.

Rasuah yang didefinisikan oleh SPRM adalah, penerimaan atau pemberian suapan sebagai upah atau dorongan untuk seseorang individu kerana melakukan atau tidak melakukan sesuatu perbuatan yang berkaitan dengan tugas rasmi. Suapan terdiri daripada wang, hadiah, bonus, undi, perkhidmatan, jawatan, upah, diskaun. Berdasarkan Akta Suruhanjaya Pencegahan Rasuah Malaysia 2009 (ASPRM 2009) Akta 694 terdapat empat kesalahan rasuah yang utama iaitu; meminta atau menerima korupsi, menerima suapan, mengemukakan tuntutan palsu dan salah guna kuasa.¹²

Syed Hussein al-Attas mengemukakan beberapa ciri-ciri rasuah antara lain; 1. Suatu pengkhianatan terhadap kepercayaan. 2. Penipuan terhadap badan kerajaan, institusi swasta atau masyarakat umumnya. 3. Dengan sengaja mengetepikan kepentingan umum berbanding kepentingan khusus. 4. Dilakukan secara berahsia, kecuali dalam keadaan di mana orang-orang yang berkuasa atau bawahannya menganggapkan tidak perlu, 5. Melibatkan lebih daripada seorang atau pihak. 6. Adanya kewajipan dan keuntungan bersama, dalam bentuk wang atau ganjaran yang lain. 7. Terpusatnya kegiatan (rasuah) pada mereka yang menghendaki keputusan yang pasti dan mereka yang dapat mempengaruhinya. 8. Adanya usaha untuk

⁸ Abu Abdul Halim Ahmad S, *Bahaya Korupsi Kepada Masyarakat Menurut Islam*, op.cit5

⁹ Yusuf Qaradhwai, *Halal dan Haram*, terj. Abu Sa`id al-Falahi, (Jakarta: Robbani Press, 2007), 382

¹⁰ Mohammad Zaini Yahya & mohd. Sukki Othman, *Haramkah Korupsi?*. (Kuala Lumpur: penerbit pustaka Yamien, 2009), 7

¹¹ Deliar Noer. *Islam dan Politik*. (Jakarta: Penerbit Yayasan Risalah, 2003), 206

¹² *Suruhanjaya Pencegahan Rasuah Malaysia*, <http://www.sprm.gov.my/apa-itu-rasuah.html> dicapai 3 Mar 2013

melindungi perbuatan rasuah dalam bentuk-bentuk justifikasi undang-undang dan 9. Penyataan dwifungsi yang bercanggah oleh mereka yang melakukan rasuah.¹³

Para ulama kebanyakannya membincangkan amalan korupsi dalam konteks rasuah. Namun, perkataan rasuah didapati tidak mewakili maksud korupsi sebenar dalam pemakaian semasa khasnya di Indonesia.

Korupsi telah memiliki makna yang luas menurut Undang-Undang no 30 tahun 2002. Definisi korupsi menurut Undang-Undang tentang KPK ini telah mengalami transformasi, iaitu, perbuatan yang menyebabkan kerugian terhadap kewangan negara, suap menuap, penggelapan dalam jabatan, pemerasan, perbuatan curang, konflik kepentingan, pengadaan dan gratifikasi. Perbuatan-perbuatan seperti; merintangi proses perkara korupsi, tidak memberi keterangan atau memberi keterangan yang tidak benar, bank yang tidak memberikan keterangan account bank tersangka, saksi atau ahli yang tidak memberi keterangan atau memberi keterangan palsu, orang yang memegang rahsia jabatan tidak memberikan keterangan atau memberikan keterangan palsu, saksi yang membuka identiti pelapor juga dianggap sebagai sebahagian dari jenayah (tindak pidana) korupsi menurut Undang-undang KPK.¹⁴ Namun demikian kelemahan undang-undang ini ia belum merangkumi rasuah yang melibatkan swasta.

Pengertian Rasuah Menurut Islam

Rasuah dalam Islam tidak memiliki makna yang tunggal. Ia di fahami melalui banyak maksud, pengertian dan istilah dalam Islam sebagaimana yang akan dijelaskan berikut. Dalam Ensiklopedia Hukum Islam, korupsi bererti perbuatan buruk atau tindakan menyelewengkan dana, wewenang, waktu, dan sebagainya demi kepentingan peribadi sehingga menyebabkan kerugian bagi pihak lain.¹⁵ Hamka memahami rasuah berasal dari kalimat *yaghulla* dan *yaglul* yang bererti curang. Iaitu seseorang yang mengambil barang sesuatu lalu memasukkan dengan sembunyi ke dalam kumpulan barang-barangnya yang lain.¹⁶

Menurut al-Sya`rawi, *Suht* memiliki makna yang sangat luas iaitu setiap harta yang bersumber dari yang haram seperti rasuah, riba, mencuri, penggelapan (harta awam), meragut, merompak.¹⁷ Termasuk dari rasuah atau korupsi adalah *syaraqah* (pencurian), *ghazab* (penggunaan hak orang lain tanpa izin), *ghulul* (penyelewengan harta negara dalam ghanimah), *rasyuah* (suapan), *khianah* (khianat) dan *harobah* (perampasan). Jika rasuah mengarah kepada kerosakan makro ekonomi dan sosial negara, maka layak dikategorikan sebagai *hirobah* iaitu perompakan yang hukumannya boleh hukuman mati.¹⁸

Para *fuqaha'* dan ulama Muslim menetapkan bahawa sekiranya seluruh pelaku kejahatan rasuah dikenakan hukuman yang berat sesuai dengan ketetapan syariah Islam, maka hal itu akan

¹³ Syed Hussein Alatas, *Korupsi Sifat, Sebab dan Fungsi*. (Kuala Lumpur: penerbit Dewan Bahasa dan Pustaka, 2009), xvi

¹⁴ Komisi Pemberantasan Korupsi, *memahami untuk membasmikan* (Buku Panduan Untuk Memahami Tindak Pidana Korupsi). (Jakarta: penerbit KPK, 2006), 16-17

¹⁵ *Ensiklopedi Hukum Islam*. (Jakarta: Penerbit Ichthiar Baru Van Hoeve jilid 2, 1999), 974

¹⁶ Hamka, *Tafsir al-Azhar*. (Singapura: penerbit Pustaka Nasional, 1990), 977

¹⁷ Muhammad Mutawaly al-Sya`rawy. *Tafsir al-Sya`rawy. Akhbar yaum* juz 6 (Kaherah: Al-Azhar, 1961), 3258

¹⁸ Amru Muzan, Korupsi, Suap dan Hadiah Dalam Islam, *Jurnal Hukum Islam*, (Disember 2007), 624

memudahkan realisasi pencapaian kemaslahatan masyarakat. Masyarakat akan menjadi stabil dan pembangunan yang menyeluruh pun akan tercapai.¹⁹

Korupsi menurut keputusan Majlis Tarjih Ulama Muhammadiyah dimasukkan dalam kategori sebagai berikut; *ghulul*, iaitu menggelapkan harta rampasan perang dengan tujuan memperkaya diri sendiri, merugikan orang lain bangsa dan negara, penyalahgunaan kuasa, melawan hukum, norma dan moral dalam masyarakat. *Riswah*, (suap), *khianat*, *Mukabarah*, *ghasb*, *saraqah* (pencurian), *intikhāb* (penyeluk saku atau mengutil), dan *akl suht* (makan hasil atau barang haram).²⁰

Sementara setelah pengkaji mewawancara beberapa orang yang lama tinggal di dunia Arab mengatakan bahawa kalimat yang paling tepat untuk korupsi yang biasa digunakan dalam bahasa Arab yang masyhur dipakai dalam dunia Arab saat ini adalah *ikhtilash*.²¹ *Ikhtilash* dalam Kamus Bahasa Arab-Melayu dertiakan dengan penyelewengan, sementara dalam bahasa Indonesia difahami dengan penggelapan. *Khalasha*, *yakhlishu*, *ikhtilasan* juga bermaksud mengambil dengan sembunyi.²² Inilah hasil wawancara penulis dengan beberapa bekas penuntut di Arab, mahasiswa Pengajian Islam Indonesia di Universiti Malaya.

Dari definisi yang dikemukakan oleh para ulama, para tokoh, maka jelas sekali bahawa antara KPK dan SPRM telah memiliki pengertian dan pemahaman yang berbeza tentang korupsi dan rasuah. Korupsi memiliki makna yang luas, sementara rasuah atau sogokan adalah sebahagian dari korupsi. Untuk itu penggunaan kalimat korupsi menurut penulis lebih tepat digunakan dalam kajian ini daripada rasuah kerana ianya memiliki makna yang dalam dan tidak sempit sebagaimana istilah rasuah.

Pembahasan Korupsi Dalam al-Quran

Islam adalah jalan hidup manusia paling sempurna yang membimbing umatnya ke arah kesejahteraan dan kebahagiaan.²³ Tujuan hukum Islam adalah untuk kemaslahatan manusia. Antara kemaslahatan itu ialah dengan cara memelihara harta dari pemindahan hak milik dengan cara yang tidak mengikuti proses hukum Syarak. Ulama fikah sepakat bahawa korupsi adalah haram kerana ianya bertentangan dengan Maqasid al-Syar`iyyah (tujuan hukum Islam)²⁴

Rasuah dalam pelbagai kitab Tafsir sebagaimana yang akan dijelaskan di bawah dertiakan dengan sogokan. Ia erat kaitannya dengan seseorang yang ingin mendapatkan harta yang bukan haknya dengan jalan memberi sogokan kepada hakim agar memenangkan nya dalam keputusan mahkamah. Inilah pandangan ahli Tafsir seperti Hamka dan Wahbah al-Zuhaili yang akan dijelaskan di bawah.

Sebahagian dari perbuatan korupsi ialah dengan cara menuap hakim dan peguam cara, agar memperjuangkan dan memenangkan nya dalam sesuatu perkara yang sebenarnya bukan

¹⁹ Dr. Husain Syahatah, *Suap dan Korupsi Dalam Perspektif Syariah*, terjemahan Kamran As`ad Irsyady, (Jakarta: Sinar Grafika Offset, 2005), 23

²⁰ Syamsul Anwar et. al, *Fikih Anti Korupsi Perspektif Ulama Muhammadiyah*, (Jakarta: Majelis Tarjih dan Tajdid PP Muhammadiyah, 2006), 54

²¹ Wawancara dengan Suhaili bekas pelajar di Mesir

²² Idris Marbawi. *Kamus Idris al-Marbawi* (Indonesia: Penerbit Dar Ihya Kitab al-Arabiyyah, tt), 183 & 12

²³ Sayyid Muhammad Husain Thabathaba'i. *Memahami Esensi al-Qur'an*. (Jakarta: penerbit Lentera, 2000), 13

²⁴ Tim Penyusun, *Ensiklopedi Hukum Islam*, op.cit 974

menjadi haknya. Akan tetapi disebabkan kerana bayaran dan kemahirannya dalam berhujah, seseorang itu dimenangkan perkaranya oleh mahkamah. Maka keputusan hakim tidak menghalalkan yang haram dan tidak pula mengharamkan yang halal. Hakim hanya menghukum yang zahir, sementara yang berdosa adalah pihak yang menipu. Demikianlah yang difahami oleh Sayid Qutb²⁵ sebagaimana yang diungkapkan dalam al-Quran Surah al-Baqarah Ayat 188;

Dan janganlah kamu makan harta-harta sesama kamu dengan cara yang tidak benar dan janganlah kamu membawa kes-kes harta itu kepada hakim-hakim dengan tujuan supaya kamu dapat memakan sebahagian dari harta orang lain dengan cara yang berdosa, sedangkan kamu mengetahuinya.

Sebab turunnya ayat ini ialah, telah berkata Sa`id bin Jubai. Suatu waktu Imrul Qais Bin Abis bersengketa tanah dengan Abdan Bin Asywa` al-Hadharami. Keduanya datang meminta keadilan pada Nabi SAW. Lalu Qais hendak bersumpah di hadapan hakim untuk menguatkan pengakuannya atas hak milik tanah yang diperebutkan. Kemudian Allah menurunkan ayat di atas. Menurut Imam Sayuti, hak milik tanah itu akhirnya diserahkan kepada Abdan.²⁶ Ibn `Arabî menjelaskan ayat ini dengan tidak bolehnya mengambil dan memanfaatkan harta orang lain dengan jalan batil. Ini kerana saudara se Islam kamu adalah seperti diri kamu sendiri. Nabi juga mengatakan bahawa kaum Muslimin itu seperti jasad yang sama, apabila ada sebahagian lain yang terluka maka semua akan merasa kesakitannya.²⁷

Wahbah Zuhayli memberi penjelasan ayat ini dengan memberi korupsi kepada hakim supaya hakim memberi keputusan yang berpihak kepada si pemberi korupsi.²⁸ Ayat ini menurutnya adalah semacam peringatan agar tidak memberi korupsi kepada hakim dengan tujuan untuk mengambil harta orang lain dengan jalan haram seperti sumpah palsu, saksi palsu.²⁹ Bahkan dalam fatwanya, Yusof al-Qaradhawi mengatakan haram hukumnya melakukan korupsi untuk membebaskan seorang tahanan penagih dadah walaupun memiliki alasan bahawa sang penagih dadah tersebut adalah satu-satunya yang menjadi sumber nafkah keluarga yang ramai di bawah tanggungannya.³⁰

Kemudian yang berkaitan dengan korupsi ialah berlaku curang dengan cara menyembunyikan harta yang bukan miliknya ke dalam miliknya. Perilaku ini adalah berdosa dan hukuman yang berat di akhirat menanti si pelaku. Hamka memahami pangkal ayat ini dengan kesatuan, persaudaraan dan kekeluargaan. Ertinya harta benda saudara yang dirugikan adalah bererti kerugian kita secara langsung mahupun tidak langsung. Menganiaya harta orang lain samalah dengan menganiaya diri sendiri. Maksudnya ialah segala usaha mencari keuntungan dengan jalan yang tidak wajar dan merugikan sesama manusia. Ia akan merosak sistem ekonomi masyarakat kerana ada yang memperoleh kekayaan dengan cara membolot duit rakyat dan penipuan kepada sesama manusia.³¹

Menurut Hamka lagi, silaturahim sesama manusia jauh lebih tinggi nilainya dibandingkan dengan harta benda yang sebentar dan akan punah. Apalagi harta yang didapat dari jalan yang

²⁵ Sayyid Qutb, *Tafsir Fi Zilali al-Qur'an* (Kaherah: Dar al-Shuruq, 1995), 176

²⁶ Imam Jalaluddin As-Sayuti, *Asbabun Nuzul*, terj. Q. Saleh et. al (Kuala Lumpur: Victor Agencie, 2002), 81

²⁷ Ibn `Arabî, *Ahkam al-Qur'an* (Dar al-Fikr al-`Arabi), 97

²⁸ Al-Zuhayli. *Al-Tafsir al-Munir fi al-'Aqidah wa al-Shari'ah wa al-Manhaj*, 202

²⁹ *Ibid*, 165

³⁰ Yusof al-Qardhawi. *Fatwa-Fatwa Semasa*. Terj Sulaiman Ibrahim. (Kota Baru: Penerbit Pustaka Aman Press, 1994), 109

³¹ Hamka, *Tafsir al-Azhar*, 439

salah itu amatlah panas di tangan atau tidak berakah. Membawa gelisah dan menghilangkan ketenteraman, keberkatan. Walaupun nampak di luarnya mampu, pada batinnya itulah orang yang amat miskin. Kosong dan selalu merasa tidak puas, ada yang hilang dari diri, tetapi tidak tahu apa yang hilang itu.³²

Para mufasirin mengemukakan banyak hal yang dilarang dalam lingkungan pertama ayat ini, antara lain memakan riba, menerima zakat bagi yang tidak berhak menerimanya dan agen yang melakukan penipuan terhadap penjual atau pembeli. Kesimpulan ayat ini ialah; tidak boleh memakan harta orang lain dengan jalan yang tidak sah. Tidak boleh menyogok dan menerima sogokan untuk memperoleh sesuatu yang tidak sah dan membuat sumpah palsu atau menjadi saksi palsu.³³

Dalam tafsir ayat hukum as-shabuni, *Yaminul ghamus* ialah Sumpah yang diucapkan orang yang dengan sumpahnya itu ia mengambil sebagian harta seorang Muslim, sedang ia berdusta dengan sumpahnya termasuk dosa besar selain Syirik dan derhaka pada orang tua.³⁴

Dalam Tafsir Ibn Katsîr dinyatakan bahawa keputusan hakim yang memenangkan orang salah dan mengalahkan orang benar tidaklah membuatnya berhak menikmati harta itu, jika ia tahu bahawa itu bukan haknya. Ini kerana hakim adalah manusia biasa yang tidak luput dari tersalah dan silap dalam mengambil keputusan. Di akhirat nanti seseorang juga akan tahu siapa yang benar dan siapa yang salah untuk mendapatkan pengadilan Tuhan.³⁵ Untuk itu diperlukan peranan *Muhtasib* yang harus bertindak tegas pada hakim yang gagal memenuhi tanggungjawabnya.³⁶

Ayat kedua yang berkaitan dengan korupsi ialah Firman Allah SWT. Dalam Surah Ali Imran Ayat 161 iaitu;

Tidak mungkin bagi seorang Nabi menggelapkan harta rampasan perang (ghulul) dan barang siapa yang menggelapkan harta rampasan perang nescaya ia akan membawa bersamanya pada hari kiamat segala sesuatu yang digelapkan nya. Kemudian setiap orang dibalas dengan sempurna terhadap apa yang telah dilakukannya dan mereka tidak akan dianianiya.

Asbab nuzul ayat ini menurut Imam Sayuti adalah, telah menjelaskan Abbas bahawa setelah perang Badar kaum Muslim mendapat harta rampasan perang yang banyak. Pada saat itu ada sebuah permaidani merah yang hilang dari tempat penyimpanan. Ada yang mengatakan "Mungkin Rasulullah yang mengambilnya. Lalu turunlah ayat ini yang bertujuan menafikan tuduhan itu."³⁷

Nabi Muhammad SAW. dijamin oleh Allah bahawa dia seorang yang berlaku jujur, adil, amanah, lurus yang tidak mengenal kroni dalam memimpin, terutama membahagikan harta awam. Sementara seseorang yang berlaku curang dalam mengurus kewangan negara akan

³² *Ibid*, 439

³³ Team Penyusun. *Al-Qur'an dan Tafsirnya*. (Jogjakarta: penerbit UII, 1995), 319

³⁴ M. Ali As Shabuni, terj. Saleh Mahfoed, *Tafsir Ayat-Ayat Hukum Dalam al-Qur'an*, (Bandung: al-Ma'arif, 1994), 991

³⁵ Abu al-Fida' Isma'il bin Umar bin katsir, *Tafsir Ibn Kathir*. (Riyad: Dar al-Salam, 2004), 317

³⁶ Mardzelah Makhsin. *Hisbah Sistem Pengawasan dan Etika Pengurusan Islam*. (Kedah: Penerbit UUM, 2008), 88

³⁷ Imam Jalaluddin As-Sayuti, *Asbabun Nuzul*, terjemahan Q. Saleh et. al (Kuala Lumpur: Victor Agencie, 2002), 175

mendapat hukuman di akhirat walaupun kemungkinan mereka boleh terlepas dari hukuman dunia. Menurut Mahmud Yunus, ayat ini mengingatkan kepada pemegang kekuasaan untuk menyampaikan hak-hak rakyat dengan baik.³⁸

Berkaitan dengan ayat di atas, Prof. Dr. Hamka mengertikan *Ghalla, yaghullu, ghallan* dengan seseorang yang mengambil barang sesuatu lalu memasukkan dengan sembunyi ke dalam kumpulan barang-barangnya yang lain. Atau dalam bahasa Indonesia dieritkan dengan curang.³⁹

Menurut Ibn Arabi, kalimat *ghalla* ialah pengkhianatan dalam harta rampasan perang, iaitu dengan memasukkan harta benda yang diambilnya ke dalam barang-barangnya lalu ditutupnya dalam barang-barangnya.⁴⁰

Ghulul juga bererti mengambil secara sembunyi milik orang banyak.⁴¹ Dan orang yang berkhanat terhadap milik orang banyak, betapa pun kecil dan rendah harganya, kelak pada hari kiamat pasti akan diminta untuk mempertanggungjawabkan perbuatannya itu. Ayat ini menurut beliau dapat diambil iktibar dan sari patinya, jika kita mendapat kesempatan menduduki tempat yang mulia seperti ketua perang atau ketua pemerintahan bahawa jika ada kekayaan negara janganlah curang dan jangan berbuat korupsi dengan harta negara. Sebab di hari kiamat mereka akan didatangkan bersama apa yang pernah mereka曲ang itu.⁴²

Ayat ketiga yang selalu dikaitkan dengan perbuatan korupsi ialah surah al-Maidah ayat 42;

Mereka amat gemar mendengar perkataan yang berdusta dan amat gemar memakan harta yang haram. Oleh itu jika mereka datang kepada mu (untuk meminta keputusan) maka adili di antara mereka atau berpaling lah dari mereka dan jika engkau berpaling dari mereka, maka mereka tidak akan dapat memudaratkan engkau sedikit pun dan jika engkau adili, maka adil lah di antara mereka dengan adil. Sesungguhnya Allah kasihkan orang-orang yang adil.

Sebab penurunan ayat ini ialah telah telah menjelaskan Ibnu Abbas bahawa zaman jahiliah Bani Nadhir lebih mulia dari Bani Quraizah. Pada saat Muhammad menjadi Rasul seorang lelaki Bani Nadhir membunuh seorang lelaki dari Bani Quraizah. Lalu mereka meminta fatwa pada Nabi tentang perkara ini.⁴³

Dalam tafsir al-Azhar Hamka disebutkan bahawa sokongan besar akan diberikan Tuhan kepada Nabi Muhammad lantaran menegakkan keadilan itu, sebab hanya dengan keteguhan menegakkan keadilan, ketenteraman dan kekuatan akan tercapai. Kedatangan Yahudi kepada Nabi Muhammad sebenarnya tidak ikhlas minta diadili menurut Qur'an, tetapi ingin supaya ditetapkan hukuman yang lebih ringan dari Taurat. Ini kerana isi Taurat tidak sesuai dengan keinginan mereka kerana terlalu banyak makan harta haram (*suht*).⁴⁴

Menurut Hamka lagi, ayat ini menceritakan tentang sifat orang Yahudi yang suka makan harta haram "*suht*". Kalimat *suht* membawa makna merosak dan membinasakan kerana ia

³⁸ Mahmud Yunus, *Al-Qur'an Terjemah dan tafsir Mukhtasar*. (Selangor: penerbit Darul Furqaan, 2013), 98

³⁹ Hamka, *Tafsir al-Azhar*, 439

⁴⁰ Ibn Arabi Abu Bakar Muhamad Bin Abdullah, *Hukum-Hukum Dalam Qur'an* (terj. Mohd Ramli Omar). (Kuala Lumpur: penerbit JAKIM, 2006), 559

⁴¹ Team Penyusun, *Al-Qur'an dan Tafsirnya*. (Jogjakarta: penerbit UII, 1995), 76

⁴² *Ibid*

⁴³ Muhammad Hatta, *Tafsir Per kata Magfirah*. (Jakarta: penerbit Magfirah, 2010), 155

⁴⁴ Hamka, *Tafsir a-Azhar*, 1739

merosak keberkatan⁴⁵. Menurutnya lagi, ayat ini diturunkan kerana mereka ingin membujuk Nabi sebagai hakim agar memenangkan kes mereka. Namun Nabi tidak mengabulkan permintaan itu kerana Beliau mendapat petunjuk dari Allah SWT⁴⁶.

Antara sifat orang Yahudi menurut Maraghi ialah suka menerima suap agar membenarkan yang salah atau menyalahkan yang benar. Ia menjadi salah satu mata pencarian mereka terutama jika berurusan dengan penguasa-penguasa. Hukum dapat dipermudah dan dipermainkan dengan suapan yang menjadi kebiasaan Yahudi.⁴⁷ Para ulama Yahudi menurut Ibn Katsir akan memberi jawapan yang disukai kepada orang yang memberinya korupsi.⁴⁸ Mereka menjadikan yang haram itu halal dan sebaliknya. Menjadikan yang benar itu batil dan sebaliknya.⁴⁹

Sayid Qutb mengkategorikan korupsi kepada *akl suht* merujuk kepada firman Allah SWT. Surah al-Maidah ayat 62 dan 63.

Dan engkau dapat melihat kebanyakan dari mereka (kaum Yahudi) berlumba-lumba melakukan dosa dan pencerobohan dan memakan harta haram. Sesungguhnya amatlah keji perbuatan-perbuatan yang telah dilakukan mereka.

Mengapa rahib-rahib dan paderi-paderi tidak melarang mereka dari mengeluarkan perkataan-perkataan yang berdosa dan dari memakan harta haram. Sesungguhnya amatlah keji perbuatan yang telah dilakukan mereka.⁵⁰

Al-Maraghi mengertikan *akl-Suht* dengan usaha yang buruk dan diharamkan. Ia akan mendapatkan celaan dengan menyebabkan orang lain membincangannya dengan cara kurang elok seperti memberi korupsi dalam urusan pengadilan.⁵¹

Hamka dalam Tafsir Al-Azhar mengertikan *Suht* ialah harta wang suap, wang sogok. Sementara erti harfiah Suhti ialah menekan sampai mati.⁵² Hamka mengatakan, sesuai diertikan dengan suap, sebab kalau sudah disuapkan mulut mereka terkatup mati tidak bicara lagi, sehingga mati bicara. Mereka tidak berani lagi menegur yang salah dan menegakkan hukum keadilan.⁵³ Sudah menjadi tabiat Yahudi suka memakan harta haram seperti riba, wang suap, korupsi. Allah mencela rahib-rahib Yahudi yang tidak melarang orang-orang Yahudi berbohong dan memakan yang haram dan membiarkan mereka karam dalam lautan kejahatan. Ayat ini mengingatkan agar para ulama umat Islam tidak melakukan kejahanan yang sama sebagaimana yang dilakukan oleh rahib Yahudi.⁵⁴

Menurut Mahmud Yunus, para rahib itu turut berdosa kerana membiarkan kejahanan berlaku tanpa melakukan Amar Makruf dan Nahi Munkar seperti mencegah korupsi yang menjadi bahagian dari tugas mereka. Hal ini juga berlaku pada umat Islam yang ramai

⁴⁵ *Ibid*

⁴⁶ *Ibid*

⁴⁷ Ahmad Bin Mustafa al-Maraghi. *Tafsir al-Maraghi*(Mesir: Al-babi al-Halabi), 6; 120

⁴⁸ Isma'il bin Umar bin katsir, *Tafsir Ibn Kathir*, 152

⁴⁹ *Ibid*, 1; 308

⁵⁰ Sayyid Qutb, *Tafsir Fi Zilali al-Qur'an*. (Kaherah: Dar al-Shuruq, 1995), 176

⁵¹ Mustafa al-Maraghi. *Tafsir al-Maraghi*, 6; 120

⁵² Hamka, *Tafsir al-Azhar*, 1738

⁵³ *Ibid*. h. 1789

⁵⁴ Team Penyusun, *Al-Qur'an dan Tafsirnya*. (Jogjakarta: penerbit UII, 1995), 474

melakukan korupsi, rasuah dan sebagainya kerana tidak dilarang oleh alim ulamanya, maka alim ulama Islam turut berdosa juga kerana membiarkan kejahatan tanpa melarang.⁵⁵

Adapun ayat “*dan Janganlah kamu jual ayat-Ku dengan harga murah*” dalam Surah al-Ma’idah ayat 44 itu ditafsirkan dengan menukarnya dengan jalan menerima korupsi sebagaimana yang ditulis dalam tafsir Wasith.⁵⁶ Sementara Tafsiran surah al-Anfal ayat 28 yang bermaksud “*sesungguhnya harta dan anak kamu adalah fitnah*” ditafsirkan oleh Tafsir Wasith dengan jangan campur adukkan harta kamu dengan sesuatu yang haram/dosa. Jangan besarkan anak dengan rezeki yang didapat dari jalan maksiat seperti mencuri dan meminta korupsi.⁵⁷ Dalam Tafsir Jalalain dinyatakan bahawa pelaku korupsi akan diberi balasan neraka *weil* nanti di akhirat.⁵⁸

Korupsi Menurut al-Sunnah

Dalam Kitab al-Sittah Sahih Bukhari, Sahih Muslim, Sunan Abi Daud, Jami` al-Tarmizi, Sunan Nasa`i dan Sunan Ibn Majah tidak ditemukan Kitab dan bab khas yang membahas tentang korupsi. Pembahasan tentang korupsi dijumpai dalam pelbagai bab seperti bab sumpah, kitab Jihad, kitab Imarah dan sebagainya. Imam Al-Bukhari memasukkan Hadis berkenaan dengan ghulul (korupsi) di dalam kitab Sumpah dan Nazar dalam Bab *kayfa kanat yaminu*⁵⁹

Rasulullah SAW. bersabda: “ Sesungguhnya Rasulullah SAW. mengangkat seorang pegawai. Ketika selesai dari pekerjaannya, dia mendatangi Rasulullah SAW. dan berkata: Wahai Rasulullah SAW., ini untukmu (untuk baitul mal) dan ini dihadiahkan untuk ku. Kemudian SAW. berkata kepadanya: tidakkah engkau duduk di rumah ayah ibu mu, lalu engkau tunggu apakah engkau diberi hadiah atau tidak? Rasulullah SAW. pun menyampaikan khutbah malam hari setelah solat. Beliau mengucapkan syahadat, memuji Allah dengan pujian yang layak bagi-Nya, lalu ia berkata: bagaimana perilaku seorang pegawai yang kami anggap baik lalu dia datang kepada ku kemudian dia mengucapkan: “Ini hasil dari pekerjaan yang engkau berikan dan dihadiahkan kepada ku”. Tidakkah dia duduk (saja) di rumah ayah-ibunya lalu ia tunggu apakah ia diberi hadiah atau tidak? Demi Allah, Zat yang jiwa Muhammad di dalam genggamannya, setiap orang yang melakukan ghulul (korupsi), pasti dia akan datang pada hari kiamat sambil mengalungkan barang yang ia korupsi di lehernya. Jika yang dikorupi unta maka ia akan membawanya dengan bersuara, sungguh aku telah menyampaikan (peringatan ini). Abu Humaid berkata kemudian Rasulullah saw. mengangkat tangannya sampai kami melihat bulu ketiaknya. Abu Humaid mengatakan bahawa Zaid bin Tsabit mendengar pesan itu bersamaku, maka tanyakanlah kepadanya.⁶⁰

Ghulul termasuk bahagian dari korupsi kerana ia berkaitan dengan harta awam. Harta rampasan perang adalah menjadi sumber pendapatan negara. Untuk itu penyelewengan

⁵⁵ Mahmud Yunus, *tafsir*, op.cit 166

⁵⁶ Jami’ah Ulama al-Azhar. *Tafsir Wasit* (Kaherah: Penerbit al-azhar, 1973), 1018

⁵⁷ Ibid, h.1608

⁵⁸ Jalal al-din Muhammad Bin Ahmad al-Mahalli, *Sharh Minhaj al-Talibin* (Beyrut: Dar al-Kitab al-Ilmiyyah, juz , 2001), 1, h. 6

⁵⁹ Al-Bukhari, *Sahih al-Bukhari. Kutub al-Sittah*, Hadis Nombor 6636 (Makkah: Dar as_salam, 2000), 555

⁶⁰ Ibid

terhadap harta awam adalah sebahagian dari korupsi. Abu Bakar juga pernah memerangi pihak yang tidak mahu membayar zakat. Sedangkan zakat adalah juga menjadi sumber pendapatan kewangan negara.

Imam al-Bukhori memasukkan pembahasan mengenai ghulul ke dalam kitab *Jihad wa al-Sayr* dalam *Bab Ghulul* dan *Golil Ghulul* yang berbunyi;

Sufyan telah menceritakan kepada kami. Dari Amr, dari Salim ibn Abi Al-Ja'di, dari Abdullah ibn Umar berkata: bahwa pada rombongan Rasulullah shalallahu alaihi wassalam ada seorang bernama Kirkirah yang mati di medan perang. Rasulullah shalallahu alaihi wassalam bersabda: "dia masuk neraka". Para sahabat pun bergegas pergi menyelidiki perbekalan perangnya. Mereka mendapatkan mantel yang ia korup dari harta rampasan perang. (H.R Bukhari)⁶¹.

Imam Muslim memasukkan hadis berkaitan ghulul (korupsi) di dalam Kitab al-*Imarah bab Tahrim Hadiya al-Amal*. Ibn Lutbiyyah.⁶²

Diriwayatkan dari Abu Humaid as-Saaidi radhiyallahu 'anhу, ia berkata: Rasulullah SAW. telah memberi tugas kepada seorang lelaki dari Kaum al-Asad yang dikenali sebagai Ibnu Lutbiyyah. Ia melantik Amru dan Ibnu Abu Umar untuk urusan sedekah. Setelah kembali dari menjalankan tugasnya, lelaki tersebut berkata kepada Rasulullah SAW: Ini untuk Anda dan ini untukku karena memang dihadiahkan kepada ku. Setelah mendengar kata-kata tersebut, lalu Rasulullah SAW. berdiri di atas mimbar. Setelah mengucapkan puji-pujian ke hadirat Allah, beliau bersabda: "Adakah patut seorang petugas yang aku kirim untuk mengurus suatu tugas berani berkata: Ini untuk Anda dan ini untukku karena memang dihadiahkan kepadaku? Kenapa dia tidak duduk di rumah bapak atau ibunya (tanpa memegang jabatan apa-apa) sehingga ia menunggu, apakah dia akan dihadiahi sesuatu atau tidak? Demi Dzat Muhammad yang berada di tangan-Nya, tidaklah salah seorang dari kalian mengambil sesuatu darinya kecuali pada Hari Kiamat kelak dia akan datang dengan memikul di atas lehernya (jika yang diambil itu seekor unta maka) seekor unta itu akan mengeluarkan suaranya, atau seekor lembu yang melenguh atau seekor kambing yang mengembek. " Kemudian beliau mengangkat kedua-dua tangannya tinggi-tinggi sehingga nampak kedua ketiaknya yang putih, dan beliau bersabda: "Ya Allah! Bukankah aku telah menyampaikannya," sebanyak dua kali

Dalam Sunan Baihaqi disebutkan bahawa Rasulullah melaknat orang yang memberi dan yang menerima rasuah.⁶³ Dalam Nailul Athar di jelaskan bahawa hukuman bagi pelaku korupsi bukanlah hudud tetapi ta'zir yang diserahkan kepada pertimbangan hakim untuk menghukumnya. Ia tidak dipotong tangannya. Namun ada juga ulama yang mengatakan bahawa mereka dipotong tangannya berdasarkan hadis seorang wanita yang meminjam barang kemas dan tidak mahu mengembalikan kepada pemiliknya dengan menganggap bahawa ia tidak

⁶¹ Al-Bukhari, *Sahih al-Bukhari*, Hadis Nombor 3074 (Makkah: Dar as_salam, 2000), 247

⁶² Shahih Muslim. *Kutub al-Sittah*, (Makkah: DÉr as-SalÉm, 2000), Hadis Nombor 4738 (Makkah: Dar al-Salam, 2000), 1007

⁶³ Abu Bakr al-Bayhaqi. *Sunan al-Bayhaqi al-Kubra* (Makkah: Maktabah Dar al-Baz, 1994), juz 10, h. 1007

pernah meminjam barang itu, lalu Nabi memerintahkan untuk memotong tangannya, setelah mendapati barang itu ada dalam simpanan perempuan tadi.⁶⁴

Zakat dan harta rampasan perang *ghanimah* adalah antara sumber kewangan negara di masa Rasulullah SAW. Untuk itu mengambil wang zakat bagi mereka yang tidak berhak menerimanya adalah sebuah kecurangan kerana mengambil wang negara.

Imam Syafi'i memasukkan pembahasan mengenai rasuah ke dalam Kitab Zakat dalam bab *al-Hadiyah Lil Wali Bisabab al Wilayah*. Iaitu dengan mengambil kisah Ibnu Lutbiyyah yang diutus Nabi untuk mengutip zakat. Namun setelah kembali dia mengatakan ini kutipan zakat dan ini dihadiahkan untukku. Lalu Nabi menegurnya. kenapa dia tidak duduk sahaja di rumah bapaknya, atau rumah ibunya kemudian ia menunggu apakah ada yang memberinya zakat atau tidak. Menurut Imam Syafi'i dalam Kitab al-Umm, apabila seseorang memberi hadiah kepada pegawai dengan maksud agar orang tersebut mendapat sesuatu yang hak atau yang batil maka haram menerimanya.⁶⁵

Sayid Sabiq dalam Fiqh al-Sunnah tidak membahas bab korupsi atau rasuah secara khas. Beliau membahaskanya dalam bab rampasan perang dengan judul pengharaman ghulul. Menurut beliau, ijma' kaum Muslimin menghukum ghulul sebagai dosa besar. Menurutnya hakim berhak menentukan sikap yang sesuai dengan pendapatnya sama ada melakukan pembakaran harta ghulul dan pemukulan terhadap pelakunya atau hukuman lain yang dianggap bermanfaat menurut hakim. Bahkan Rasulullah tidak bersedia mensolatkan seorang yang meninggal dalam perang Khaibar kerana ia mengambil harta rampasan perang yang bernilai dua dirham.⁶⁶

Konteks keputusan pesalah korupsi yang diserahkan kepada kebijaksanaan hakim tentu sahaja hakim yang masih menjalankan syariat Islam. Sementara di Indonesia kredibiliti, akauntabiliti dan integriti hakim sudah tercaltar. Sebagaimana yang akan dijelaskan dalam Bab VI.

Al-Mawardhi membahas korupsi dalam bab jabatan hakim dalam pembahasan meminta jabatan hakim dan hadiah untuk hakim. Bagi al-Mawardhi adalah haram membayar sejumlah wang untuk mendapatkan kedudukan sebagai hakim. Dia juga mengharamkan hakim menerima hadiah dari yang berperkara atau dari masyarakat di daerah kerjanya. Al-Mawardhi mengutip hadis, Allah melaknat pemberi korupsi, penerima korupsi dan perantara korupsi. Beliau juga mengutip hadis bahawa hadiah untuk pemimpin adalah korupsi⁶⁷

Hamka telah mengumpulkan beberapa dalil akibat dari korupsi seperti akan dikutuk Allah pemberi dan penerimanya, mengkhianati Allah bagi yang bersikap kronisma, dan perlunya menjalankan kedaulatan Undang-Undang tanpa pandang bulu.⁶⁸

Ibn Rusyd menulis bahawa hukum bagi korupsi masih menjadi perbezaan pendapat di kalangan para ulama. Orang yang mencuri harta rampasan perang atau harta baitulmal menurut Imam Malik dipotong tangannya. Akan tetapi menurut yang lain tidak dipotong tangannya.⁶⁹

⁶⁴ Mu'ammal Hamidy et.al. *Terjemahan Nailul Athar, Himpunan Hadis-Hadis Hukum*. (Surabaya: penerbit Bina Ilmu, 1994), 2636

⁶⁵ Al-Imam Muhammad Bin Idris as-Syafi'i, *al-Umm*, jilid 2 (Damsik: Daral Nawader, 2013h/1434h 50

⁶⁶ Sayid Sabiq, *Fikh al-Sunnah*, jilid 2, (Beirut: Dar al-Kitab al-Arabi, 1973), 682

⁶⁷ Al-Mawardi, *al-Ahkam al-Sultaniyyah*, (Beirut: Dar al-Kutub al-Ilmiyah, 2006), 96

⁶⁸ Hamka, *Hak Asasi Manusia Dalam Islam dan Deklarasi PBB*. (Kuala Lumpur: Penerbit Pustaka Dini, 2005). 203

Dalam *Nayl al-Awthar* di jelaskan bahawa hukuman bagi pelaku korupsi bukanlah hudud tetapi *ta'zir*.⁷⁰ Walaupun korupsi merupakan satu kesalahan termasuk perkara yang ditegah dengan dalil yang jelas sebagaimana Surah al-Baqarah Ayat 188;

Dan janganlah kamu makan harta-harta sesama kamu dengan cara yang tidak benar dan janganlah kamu membawa kes-kes harta itu kepada hakim-hakim dengan tujuan supaya kamu dapat memakan sebahagian dari harta orang lain dengan cara yang berdosa, sedangkan kamu mengetahui.

Menurut Ibn Taimiyah, korupsi dikenakan hukuman *ta'zir* yang diserahkan kepada kerajaan hukuman apa yang sesuai baginya. Adakalanya hukuman bunuh dikenakan jika jenayah itu tidak dapat dihentikan kecuali apabila pelakunya dibunuh.⁷¹ Menurut Hamka, sebanyak apa pun harta yang di korupsi, ia adalah teramat sangat sedikit bila dibandingkan dengan azab pedih yang akan menimpa pelaku nya kerana sebab korupsi.⁷²

Dalam musyawarah ke VI pada 25-29 Julai 2000 Majelis Ulama Indonesia tentang Suap (Risyawah), Ghulul, Korupsi (ghulul) dan hadiah kepada pegawai, MUI memfatwakan haram memberi dan menerima ryswah dan hadiah yang menyebabkan konflik kepentingan.⁷³

Korupsi Sebagai Perbuatan Mungkar

Korupsi adalah termasuk perbuatan mungkar yang menjadi tugas bersama umat Islam menghentikannya. Untuk itu hendaklah tidak dilupakan tugas terbesar umat Islam sebagai umat terbaik iaitu sebagaimana yang dicantumkan dalam Surah Ali Imran ayat 104 yang bermaksud;

Dan hendaklah di antara kamu ada segolongan orang yang menyeru kepada kebaikan, menyuruh (agar membuat) yang makruf dan mencegah daripada yang mungkar. Dan mereka itulah orang-orang yang berjaya

Dan surah Ali Imran ayat 110 yang bermaksud;

Kamu (Wahai Umat Muhammad) adalah sebaik-baik umat yang dilahirkan bagi (faedah) umat manusia, (kerana) kamu menyuruh berbuat segala perkara yang baik dan melarang daripada segala perkara yang salah (buruk dan keji), serta kamu pula beriman kepada Allah dengan sebenar-benar iman.

Hamka dalam Tafsir Al-Azhar mengatakan bahawa derajat "khaira ummah" atau umat terbaik bagi umat Islam bukanlah sesuatu yang percuma atau automatik. Ianya harus diikuti dengan dua syarat iaitu umat itu harus; 1. Menyuruh kepada kebaikan dan 2. Mencegah dari kemungkaran.

Tafsir Ibn Kathir mengutip hadis Nabi mengenai tata cara amar makruf Nahy munkar.

⁶⁹ Ibn Rusyd, *Hidayatul Mujtahid*. terj. Abdurrahman (Semarang: penerbit Asy-Syifa, 1990), 661

⁷⁰ Mu'ammal Hamidy et.al. *Terjemahan Nailul Athar, Himpunan Hadis-Hadis Hukum*. (Surabaya: penerbit Bina Ilmu, 1994), 2636

⁷¹ Ibn Taimiyah, *al-Siasah al-Syariah fi islah al-raa`iy wa al-ra`yah*, (Riyadh: Dar Ilmu Fawaid, 728 H), 100

⁷² Wahbah Bin Muhammad al-Zuhayli, *al-Tafsir al-Munir fi al-'Aqidah wa al-Shari'ah wa al-Manhaj*. (Damsyik: Dar al-Fikr al-Mu'asir, 1418 H.), 265, juz 3

⁷³ Majelis Ulama Indonesia, *Suap (Risyawah), Ghulul, Korupsi (ghulul) dan hadiah kepada pegawai* <http://mui.or.id/wp-content/uploads/2014/11/23.-Risyawah-suap-Ghulul-korupsi-dan-hadiah-kepada-pejabat.pdf>, dicapai 17 Ogos 2015

Sesiapa yang melihat kemungkaran di antara kamu maka ubahlah dengan tangannya, jika ia tidak mampu maka ubahlah dengan lisan nya dan jika tidak mampu maka bencilah dalam hati. Yang demikian itu adalah selemah-lemah iman.⁷⁴

Dalam Kamus Marbawi dinyatakan bahawa Munkar bererti perkara-perkara yang dipandang keji oleh Syara'.⁷⁵ Dalam Kamus Dewan edisi keempat Mungkar diertikan ingkar atau menderhaka kepada Tuhan (Melanggar perintah Tuhan). Memungkiri tidak menurut (perintah Tuhan), memungkiri mengingkari. Kemungkaran perihal mungkar, penderhakaan.

Ibn Taimiyah menulis bahawa orang-orang mukmin mukalaf mempunyai komitmen bersama dalam ber amar makruf nahi Munkar. Ianya bukan keharusan untuk semua orang kerana ia bukan salah satu syarat penyampaian risalah⁷⁶. Ianya disesuaikan dengan kemampuan masing-masing untuk merobah nya dengan kuasa, lidah dan dengan membencinya dalam hati bagi yang lemah imannya.

Korupsi telah membuat pegawai yang digaji dari wang masyarakat tidak menjalankan tugas dan wewenangnya dengan amanah. Lebih berpihak pada siapa yang mampu daripada menjalankan tugas sebagai pelindung dan penjaga keamanan masyarakat.⁷⁷

Harta yang diperoleh dari mencuri, merompak, menipu atau korupsi bukanlah hak milik sah si pelaku. Harta itu harus dikembalikan pada pemilik atau orang-orang yang berhak dengannya. Korupsi adalah bentuk pengkhianatan yang menjadi ciri-ciri orang munafik iaitu; apabila bicara berbohong, apabila berjanji mungkir dan apabila diberi amanah dia khianat. Disumpah waktu pertama kali memangku suatu jawatan untuk bersikap jujur dan amanah, tapi berkhanat. Sementara orang munafik menurut al-Qur'an ditempatkan di kerak api neraka.⁷⁸

Menurut Al-Shatibi dalam bukunya al-Muwafaqat ada dua tujuan syarak` dalam Islam iaitu; untuk menolak kebinasaan dan mencapai kemaslahatan, "draf'u al mafasid wa jalbu al-masalih." Metode ini beliau uraikan menjadi lima macam `Maqasid al-syariah` iaitu; Menjaga agama, Menjaga nyawa, Menjaga kehormatan, Menjaga akal dan menjaga harta. Lima Tujuan syarak` tersebut juga digunakan sesuai dengan tiga keadaan iaitu; *daruriyyah*, *hajjiyyah* dan *hahsiniyyah*⁷⁹. Disebabkan korupsi adalah bahagian dari kerosakan, maka menolak kerosakan yang akan timbul akibat dari perilaku korupsi juga sebahagian dari Maqasid as-Syariah.

Disebabkan korupsi adalah perbuatan munkar, *fasad*, khianat, buruk dan sejenis dengannya, maka pendekatan pemberantasan korupsi juga harus dilakukan sebagaimana cara menghadapi kemungkaran sebagaimana hadis Nabi SAW di atas. Ini sesuai dengan teori moden yang mengemukakan perlunya kerjasama antara kerajaan, masyarakat dan dunia usaha dalam membanteras korupsi.

⁷⁴ Abu al-Fida' Isma'il bin umar bin katsir, *Tafsir Ibn Kathir*, 534

⁷⁵ Marbawi "Kamus Marbawi", op.cit 345

⁷⁶ Ibn Taimiyah, *Tugas Negara Menurut Islam*, terj Moh. Akram Khan, (Yogyakarta: Pustaka Pelajar, 2004), 96

⁷⁷ Dwiyanto Indiahono, *Reformasi Birokrasi amplop Mungkinkah?*. (Yogyakarta: Gava Media, 2006), 80

⁷⁸ Qur'an Surah an_Nisa'

⁷⁹ Al-Shatibi, Ibrahim Ibn Musa, *al-Muwafaqat Nazariyyah al-Maqasid 'inda al-Imam al-Shatibi*. (*Riyad: Al-Ma'had al-Islami li al-Fikr al-Islami*, 1992), cet. Ke-2, h. 152-160

Pemberantasan korupsi adalah tanggungjawab bersama kerana azab dunia tidak hanya menimpa pelaku kejahanan itu sahaja tetapi juga akan menimpa orang yang tidak mencegah dosa itu daripada berlaku. Firman Allah Surah al-Anfal ayat 25;

Dan jagalah diri mu daripada (berlakunya) dosa (yang membawa bala bencana) yang bukan sahaja akan menimpa orang-orang yang zalim di antara kamu secara khusus (tetapi akan menimpa kamu secara umum) dan ketahuilah bahawa Allah Maha berat azab seksa-Nya.

Korupsi kebanyakannya adalah sebuah pengkhianatan jabatan dan amanah yang telah diberikan. Sementara al-Quran melarang kita mengkhianati amanah sebagaimana Firman Allah surah al-Anfal ayat 27;

Wahai orang-orang yang beriman! Janganlah kamu mengkhianati (amanah) Allah dan Rasul-Nya dan (janganlah) kamu mengkhianati amanah-amanah kamu sedang kamu mengetahui (salahnya)

Orang yang hidupnya hanya diperuntukkan untuk mencari harta kekayaan sahaja ketahuilah manusia tidak akan puas dengan harta kekayaan yang banyak. Jika diberi sebuah gunung emas nescaya akan meminta satu lagi gunung emas dan seterusnya. Al-Qur'an surah al-Anfal ayat 28 menjelaskan sebagai berikut;

Dan ketahuilah bahawa harta benda kamu dan anak-anak kamu itu hanyalah menjadi ujian dan sesungguhnya di sisi Allah jualah pahala yang besar.

Dan salah satu nasihat Luqman kepada anaknya dalam surah Lugman ayat 17 iaitu;

Wahai anak kesayangan ku, dirikan lah solat, dan suruh lah berbuat kebajikan, serta larang lah daripada melakukan perbuatan yang mungkar, dan bersabarlah atas segala bala bencana yang menimpa mu. Sesungguhnya yang demikian itu adalah dari perkara-perkara yang dikehendaki diambil berat melakukannya.

Surah an-Nisa ayat135 untuk berlaku adil jika menjadi saksi;

Wahai orang-orang yang beriman, jadilah kamu orang yang benar-benar penegak keadilan, menjadi saksi Karena Allah biarpun terhadap diri mu sendiri atau ibu bapa dan kaum kerabat mu. jika ia Kaya ataupun miskin, Maka Allah lebih tahu kemaslahatannya. Maka janganlah kamu mengikuti hawa nafsu Karena ingin menyimpang dari kebenaran. dan jika kamu memutar balikkan (kata-kata) atau enggan menjadi saksi, Maka Sesungguhnya Allah adalah Maha mengetahui segala apa yang kamu kerjakan.

Surah Taubah ayat 71 tentang tugas manusia

Dan orang-orang yang beriman, lelaki dan perempuan, sebahagian mereka (adalah) menjadi penolong bagi sebahagian yang lain. mereka menyuruh (mengerjakan) yang makruf, mencegah dari yang Munkar, mendirikan salat, menunaikan zakat dan mereka taat pada Allah dan Rasul-Nya. mereka itu akan diberi rahmat oleh Allah; Sesungguhnya Allah Maha Perkasa lagi Maha Bijaksana.

Pemberantasan Korupsi Pada zaman Awal Islam

Dari pelbagai ayat yang berkaitan dengan korupsi di atas dapat di analisis bahawa amalan korupsi boleh dikatakan belum lagi berlaku pada zaman awal kerajaan Islam kepimpinan Rasulullah SAW. Untuk itu, tiada agensi khas pemberantasan korupsi yang dibentuk pada zaman Rasulullah SAW. Istilah yang tepat pada zaman Rasulullah adalah mengatasi korupsi dan bukan pemberantasan korupsi kerana kalimat pemberantasan mengarah kepada sebuah penyakit kronik yang sangat parah.⁸⁰

Rasulullah apabila pulang dari perang akan menyuruh Bilal mengumumkan tiga kali supaya semua harta rampasan perang dikumpulkan. Setelah beberapa waktu seorang lelaki menyerahkan harta rampasan seutas tali unta kepada Nabi. Namun Nabi tidak mahu menerima dan mengatakan mengapa tidak dikumpulkan waktu pengumuman di buat. Lalu Rasulullah menyuruhnya agar menyerahkan kepadanya tali unta itu di Padang Mahsyar kelak. Melakukan ghulul adalah dosa besar kerana ia adalah harta hak milik awam kerana ia telah melakukan dosa kepada orang ramai yang tidak mudah meminta semua mereka menghalalkan apa yang telah di ambil. Rasulullah pernah menolak permintaan puteri kesayangannya Fatimah agar mendapatkan seorang tawanan perang untuk bekerja di rumahnya kerana itu adalah harta milik negara bukan milik Muhammad SAW.⁸¹

Apa yang dikemukakan oleh al-Qur'an tentang ayat yang berkaitan dengan korupsi di atas, adalah sebuah peringatan tentang perangai orang Yahudi zaman sebelum kedatangan Nabi Muhammad SAW yang suka melakukan amalan rasuah. Ia berbentuk peringatan kepada Nabi Muhammad SAW agar sentiasa waspada terhadap golongan Yahudi ini dan sebagai iktibar bagi umat Islam agar tidak melakukan perbuatan terkutuk itu⁸².

Untuk itu, apa yang dilakukan oleh Rasulullah dalam mengatasi korupsi adalah dengan memberikan contoh teladan bagi para sahabat ketika itu dengan kepimpinan yang hidup sederhana dan tidak bermewah-mewah. Kehidupan sederhana ini dengan sendirinya akan menafikan tuduhan bahawa bagaimana mungkin seorang pemimpin bernama Muhammad SAW akan melakukan korupsi sedangkan ia hidup dengan sangat sederhana. Ini sebagaimana yang dinyatakan dalam al-Qur'an Surah Ali Imran ayat 161 di atas.⁸³

Bahkan menurut Aishah isteri Beliau, pernah sebulan lamanya dapur mereka tidak berasap pada zaman Madinah. Umar Bin Khattab pernah menangis melihat kehidupan Rasulullah yang miskin, lalu dia jawab Rasulullah "ini adalah Nubuwat, ini bukan Kisra seperti di Persia dan bukan Kaisar seperti di Roma"⁸⁴

Dalam menghadapi kes perebutan tanah yang berlaku pada zaman Rasulullah sebagaimana yang diceritakan dalam al-Qur'an Surah Al-Baqarah ayat 188 di atas, Rasulullah tetap memenangkan si pemilik tanah, walaupun di pihak kedua bijak berhujah dan berdalih.⁸⁵

Sementara Surah al-Maidah ayat 42 menceritakan Rasulullah menghadapi korupsi dengan sikap profesionalisme dalam menghadapi dua pihak yang bersengketa dengan tetap

⁸⁰ Kamus Dewan edisi keempat. (Kuala Lumpur: Dewan Bahasa dan Pustaka, 2005), 167

⁸¹ Nik Abdul Aziz Nik Mat, *Nota Kepada Diri*, (Kuala Lumpur: Harakah, 2007), 69

⁸² Lihat, Sayyid Quib, *Tafsir FÊUilÉli al-Qur'an*. (Kaherah: DÉr al-ShurEq, 1995), 176

⁸³ Imam Jalaluddin As-Sayuti, *Asbabun Nuzul*, terjemahan Q. Saleh et. al (Kuala Lumpur: Victor Agencie, 2002), 175

⁸⁴ Hamka, *Tafsir al azhar* surat juz empat, 166 juz iv, op.cit

⁸⁵ Imam Jalaluddin As-Sayuti, *Asbabun Nuzul*, terj. Q. Saleh et. al (Kuala Lumpur: Victor Agencie, 2002), 81

mendahulukan kekuasaan hukum berada di atas kuasa orang. Beliau menegakkan kebenaran tanpa memandang suku bangsa, agama dan taraf sosial ekonomi masyarakat.⁸⁶ Ini disebut dengan *rule of law* dalam istilah modern yang menjadi sebahagian dari ciri urus tadbir baik.

Rasulullah sangat tegas dalam menghadapi korupsi agar ia tidak merebak dan menjadi kebiasaan penyakit dalam masyarakat. Bahkan korupsi yang nilainya tidak seberapa pun Beliau tidak mahu mensolatkan mayat orang yang mati syahid kerana dia mengambil harta rampasan perang yang hanya berjumlah dua dirham. Rasulullah juga menyatakan melihat orang tersebut di dalam neraka yang disebabkan oleh jumlah *ghulul* yang sedikit.

Apa yang dilakukan oleh Rasulullah dalam mengatasi korupsi di atas telah ditiru oleh sahabat Beliau Khalifah Umar Bin Khatab, beliau sangat selektif dalam mengatasi segala macam kemungkinan berlakunya korupsi. Ini termasuk mengambil tindakan terhadap Abu Hurairah yang menganggap bahawa hadiah yang diterimanya dari si pembayar zakat semasa mengutip pembayaran zakat. Khalifah Umar Bin Khattab lalu meminta Abu Hurairah memasukkan hadiah itu ke dalam baitul mal. Ia juga dilakukan oleh Khalifah Umar Bin Abdul Aziz yang menyuruh anaknya mengembalikan hadiah gelang emas yang diberi oleh pengawas baitulmal kepadanya dengan kalimat *anna laki hadza?*⁸⁷

Dengan demikian, selektif dalam menunjuk seseorang untuk menjalankan sesuatu amanah juga bahagian dari strategi pemberantasan korupsi pada zaman awal Islam. Konsep ini banyak dalam *turats* siasah syar'iyyah yang sangat menitikberatkan tentang kualiti calon pemimpin. Bahkan Islam mensyariatkan umatnya untuk mentaati pemimpin kerana Allah bukan kerana keduniaan.⁸⁸

Umar Bin Khatab juga melarang isterinya daripada mengambil hak negara. Suatu hari isterinya menghadiahkan satu botol minyak wangi kepada ratu Rom. Ratu Rom membalaunya dengan berlian, tetapi Umar menyuruhnya mengembalikan kepada negara kerana hadiah yang diberikan satu botol minyak wangi itu adalah berasal dari wang negara, balasannya juga menjadi hak negara.⁸⁹

Cara Umar Bin Abdul Aziz membanteras korupsi ialah dengan memulainya dari dirinya sendiri terlebih dahulu dalam mengembalikan hak orang lain dan dalam hidup dengan kesederhanaan.⁹⁰ Umar juga melarang para pegawainya daripada menerima hadiah dari rakyat dan melarang rakyat memberikan hadiah kepada pegawai kerana hadiah baginya adalah korupsi.⁹¹ Umar melakukan pengawasan langsung terhadap seluruh urusan negara dari penyelewengan yang mungkin sahaja dilakukan pegawainya.⁹² Antara kekuatan Umar Bin Abdul Aziz ialah kerana konsistennya dalam mengamalkan ayat al-Qur'an tentang Amar Makruf dan Nahy Munkar dan menyuruh manusia yang lain juga untuk melaksanakan amar makruf nahyi munkar tersebut.⁹³

⁸⁶ Hamka, "Tafsir a-Azhar", op.cit, h. 1739

⁸⁷ *Ibid*, 980

⁸⁸ Ibnu Taimiyah, *al-Hilafatu wa al-Mulk*, (Urdun: al-Manar, 1994), 21

⁸⁹ Moh Ezam Moh Nor & Sapto Waluyo, *Islam dan Perbendaharaan Kisah dan Teladan*, (Putrajaya: MOF, 2015),64

⁹⁰ Ali Muhammad Muhammad As-Shallabi, *Amir al-Mukminin Umar Bin Abdul Aziz, Ma'alim al-Tajdid wa al-Ishlah al-Rasyidi 'Ala Minhaj al-Nubuwah*, (Kaherah: Dar al-Tauzi` wa al-Nasyr al-Islamiyah, 2007), 45

⁹¹ Ali Muhammad Muhammad As-Shallabi, *Amir al-Mukminin Umar Bin Abdul Aziz*, 292

⁹² *Ibid*, 310

⁹³ Wahbah Zuhaili, *Khalifah al-Rashid al-Adil Umar Bin Abdul Aziz*, (Beirut: Dar Kutaibah, 1998), 192

Nor Najdah Binti Ab Rahman telah mengkaji dengan panjang lebarnya tentang tata cara Umar Bin Abdul Aziz membanteras korupsi di zamannya dalam tesis MA nya di Fakulti Pengajian Islam UKM tahun 2008 berjudul “Khalifah Umar Bin Abd al-Aziz dan Mekanisme Yang dilaksanakan dalam pencegahan rasuah” antaranya dia menerangkan bahawa Khalifah Umar Bin Abdul Aziz melakukan mekanisme integrasi antara konsep dakwah *bil hal* dengan dakwah *bil hikmah* antara lain mulai dari diri sendiri. Menjalankan fungsi institusi hisbah dengan baik dan secara musyawarah dan muafakat dalam mengambil keputusan dalam membanteras korupsi. Untuk itu menurutnya pencegahan korupsi dapat dilakukan dengan melakukan pelbagai program, iaitu; melalui pendekatan institusi keluarga yang berintegriti, mencontoh keperibadian Umar Bin Abdul Aziz yang sederhana dan tidak mengutamakan kroni, melalui pendekatan akta, menanamkan nilai-nilai agama, menyebarkan risalah dan iklan anti korupsi setiap waktu⁹⁴.

Analisa dan kesimpulan

Antara strategi pembanterasan rasuah menurut Islam adalah dengan memutus urat, benih cikal bakal berlakunya rasuah dari awal ia kelihatan bersemai lagi. Antisipasi rasuah sebelum ia membesar sangat memudahkan dalam mengatasinya dibandingkan apabila ia dibiarkan membesar terlebih dahulu. Tiada toleransi atau dispensasi sedikit pun terhadap rasuah pada zaman awal Islam. Kunci kejayaan lain dalam pembanterasan rasuah di awal Islam adalah dengan kepimpinan contoh yang hidup sederhana serta selari perkataan dengan perbuatannya. Kedua pendekatan ini sangat langka di negara orang Islam dan haruslah dihidupkan kembali iaitu tegas terhadap kejadian rasuah dan melahirkan kepimpinan contoh yang hidup sederhana serta sama perkataan dengan perbuatannya.

Rujukan

Al-Quran

Abdul Rauf Dato` Haji Hassan, *Kamus Bahasa Melayu –Arab. Selangor: Oxford Fajar, 2005*

Abu Abdul Halim Ahmad S, *Bahaya Korupsi Kepada Masyarakat Menurut Islam*. Jakarta: penerbit Al-Kautsar, 1998

Abu al-Fida', Isma'il bin Umar Ibn Kathir. *Tafsir Ibn Kathir*. Riyad: Dar al-Salam, 2004.

Abu Yazid al-Bustamami, *Kamus al-Mukhtar*. Selangor: Crescent New, 2006

Ahmad Bin Mustafa al-Maraghi. *Tafsir al-Maraghi*. Mesir: Al-Bab al-Halabi, t.t.

Ali Muhammad Muhammad As-Shallabi, *Amir al-Mukminin Umar Bin Abdul Aziz, Ma'alim al-Tajdid wa al-Ishlah al-Rasyidi 'Ala Minhaj al-Nubuwah*. Kaherah: Dar al-Tauzi` wa al-Nasyr al-Islamiyah, 2007

Amru Muzan. *Korupsi, Suap dan Hadiah Dalam Islam*. *Jurnal Hukum Islam*, (2007).

Al-Bayhaqi, Abu Bakr. *Sunan al-Bayhaqi al-Kubra*. Makkah: Maktabah Dar al-Baz, 1994.

Al-Bukhari. “Sahih al-Bukhari,” dalam *Kutub al-Sittah*. Makkah: Dar al-Salam, 2000.

Deliar Noer. *Islam dan Politik*. Jakarta: Penerbit Yayasan Risalah, 2003.

⁹⁴ Nor Najdah Binti Ab Raman, *Khalifah Umar Bin Abd al-Aziz dan Mekanisme Yang dilaksanakan dalam pencegahan rasuah*, Tesis MA Fakulti pengajian Islam UKM tahun 2008, 131

- Dwiyanto Indiahono. *Reformasi Birokrasi amlop Mungkinkah?*. Yogyakarta: Gava Media, 2006.
- Ensiklopedi Hukum Islam*. Jakarta: Penerbit Ichtiar Baru Van Hocve, 1999.
- Hamka. *Hak Asasi Manusia Dalam Islam dan Deklarasi PBB*. Kuala Lumpur: Penerbit Pustaka Dini, 2005.
- Hamka. *Tafsir al-Azhar*. Singapura: penerbit Pustaka Nasional, 1990.
- Husain Syahatah. *Suap dan Korupsi Dalam Perspektif Syariah*, terjemahan Kamran As`ad Irsyady. Jakarta: Sinar Grafika Offset, 2005.
- Ibn Arabi Abu Bakar Muhamad Bin Abdullah. *Hukum-Hukum Dalam Qur'an* (terj. Mohd Ramli Omar). Kuala Lumpur: Penerbit JAKIM, 2006.
- Ibn Rusyd. *Hidayatul Mujtahid*. terj. Abdurrahman. Semarang: penerbit Asy-Syifa, 1990.
- Ibn Taimiyah. *Al-Siasah al-Syariah fi Islah al-Raa`iy wa al-Ra`yah*. Riyadh: Dar Ilmu Fawaid, 728 H.
- Ibn Taimiyah. *Tugas Negara Menurut Islam*, terj Moh. Akram Khan. Yogyakarta: Pustaka Pelajar, 2004.
- Ibnu Taimiyah. *Al-Hilafatu wa al-Mulk*. Urdun: al-Manar, 1994.
- Idris Marbawi. *Kamus Idris al-Marbawi*. Indonesia: Penerbit Dar Ihya Kitab al-Arabiyyah, t.t.
- Jami'ah Ulama al-Azhar. *Tafsir Wasit*. Kaherah: Penerbit al-Azhar, 1973.
- Kamus Dewan* edisi keempat. Kuala Lumpur: Dewan Bahasa dan Pustaka 2005.
- Komisi Pemberantasan Korupsi, *memahami untuk membasmi (Buku Panduan Untuk Memahami Tindak Pidana Korupsi)*. Jakarta: penerbit KPK, 2006.
- M. Ali As-Shabuni. *Tafsir Ayat-Ayat Hukum Dalam al-Qur'an*, terj. Saleh Mahfoed. Bandung: al-Ma`arif, 1994.
- Al-Mahalli, Jalal al-Din Muhammad bin Ahmad. *Sharh Minhaj al-Talibin* . Bayrut: Dar al-Kutub al-'Ilmiyyah, 2001.
- Mahmud Yunus. *Al-Qur'an Terjemah dan Tafsir Mukhtasar*. Selangor: penerbit Darul Furqaan, 2013.
- Majelis Ulama Indonesia, *Suap (Risyawah), Ghulul, Korupsi (ghulul) dan hadiah kepada pegawai*<http://mui.or.id/wp-content/uploads/2014/11/23.-Risyawah-suap-Ghulul-korupsi-dan-hadiah-kepada-pejab1.pdf>, dicapai 17 Ogos 2015
- Mardzelah Makhsin. *Hisbah Sistem Pengawasan dan Etika Pengurusan Islam*. Kedah: Penerbit UUM, 2008.
- Al-Mawardi. *Al-Ahkam al-Sultaniyyah*. Beirut: Dar al-Kutub al-Ilmiyyah, 2006.
- Moh Ezam Moh Nor & Sapto Waluyo. *Islam dan Perbendaharaan Kisah dan Teladan*. Putrajaya: MOF, 2015.
- Mohammad Zaini Yahya & Mohd. Sukki Othman. *Haramkah Korupsi?*. Kuala Lumpur: penerbit pustaka Yamien, 2009.
- Mu`ammal Hamidy et.al. *Terjemahan Nailul Athar, Himpunan Hadis-Hadis Hukum*. Surabaya: penerbit Bina Ilmu, 1994.

- Muhammad Hatta. *Tafsir Per kata Magfirah*. Jakarta: penerbit Magfirah, 2010.
- Muhammad Mutawaly al-Sya`rawy. *Tafsir al-Sya`rawy. Akhbar yaum juz 6*. Kaherah: Al-Azhar, 1961.
- Nawwar Bin al-Sally. *Ar-Rasywah, Adda` wa Addawa`*. Kaherah: Dar Salam, 2015.
- Nik Abdul Aziz Nik Mat. *Nota Kepada Diri*. Kuala Lumpur: Harakah, 2007.
- Nor Najdah Binti Ab Raman. *Khalifah Umar Bin Abd al-Aziz dan Mekanisme Yang dilaksanakan dalam pencegahan rasuah*, Tesis MA Fakulti pengajian Islam UKM tahun 2008.
- Sahih Muslim. *Kutub al-Sittah*. Makkah: Dar al-Salam, 2000.
- Salim Hani Mansur. *ar-Rashwah*. Beirut: Dar Basho`ir Islamiyah, 2009.
- Sayid Sabiq. *Fiqh al-Sunnah*. Beirut: Dar al-Kitab al-Arabi, 1973.
- Al-Sayuti, Imam Jalaluddin. *Asbabun Nuzul* , terj. Q. Saleh et. all. Kuala Lumpur: Victor Agencie, 2002.
- Sayyid Muhammad Husain Thabathaba`i. *Memahami Esensi al-Qur`an*. Jakarta: penerbit Lentera, 2000.
- Sayyid Qutb, *Tafsir fi Zilal al-Qur`an*. Kaherah: Dar al-Shuruq, 1995.
- Al-Shatibi, Ibrahim Ibn Musa, *al-Muwafaqat Nazariyyah al-Maqasid `inda al-Imam al-Shatibi*. Riyad: Al-Ma`had al-Islami li al-Fikr al-Islami, 1992.
- Suruhanjaya Pencegahan Rasuah Malaysia*, <http://www.sprm.gov.my/apa-itu-rasuah.html> dicapai 3 Mar 2013.
- Al-Syafi`I, Al-Imam Muhammad Bin Idris. *al-Umm*. Damsyik: Dar al-Nawader, 2013.
- Syamsul Anwar et. al. *Fikih Anti Korupsi Perspektif Ulama Muhammadiyah*. Jakarta: Majelis Tarjih dan Tajdid PP Muhammadiyah, 2006.
- Syed Hussein Al-Attas. *Korupsi Sifat, Sebab dan Fungsi*. Kuala Lumpur: penerbit Dewan Bahasa dan Pustaka, 2009.
- Team Penyusun, *Al-Qur`an dan Tafsirnya*. Jogjakarta: penerbit UII, 1995
- Wahbah Zuhaili, *Khalifah al-Rashid al- Adil Umar Bin Abdul Aziz*. Beirut: Dar Kutaibah, 1998
- Yusof al-Qardhawi. *Fatwa-Fatwa Semasa*. Terj Sulaiman Ibrahim. Kota Baru: Penerbit Pustaka Aman Press, 1994.
- Yusuf Qaradhawi, *Halal dan Haram*, terj. Abu Sa`id al-Falahi. Jakarta: Robbani Press, 2007.
- Al-Zuhayli, Wahbah Bin Mustafa. *Al-Tafsir al-Munir fi al-'Aqidah wa al-Shari'ah wa al- Manhaj*. Damsyik: Dar al-Fikr al-Mu'asir, 1418.